

Piripu

Pauru okusiwa Piripu wānà kō pè maekwerà

Imovyvya

Aã kareta Janejare'e 'Āg omotekokuwaoka Pauru tokusiwa Piripu wānà kō pè maekwerà. Pauru oo taa taa rupi Janejare'e ayvu mojenu erokwa ipi. Jesu rekoawerà omojenu ipi. Piripu taa pè a'evo ekoi. A'evoa rupi Piripu wānà kō mō ojimotee Jesu koty rewarà kō rōmō iko ky'y (J.K.R. 16.12-40). A'e kō ajaire opātavō Pauru oo jē taa taa rupi poromotekokuwa remē. Okarakurinō imono. Āmē ijatyry kwaray paire, ojikō'ō mē kō mō omopā'ā Pauru. Jimopā'āga pe wyi Pauru aã kareta okusiwa imono Piripu taa wānà kō pè. A'e kō karakuri mō omuroka ijupe. A'e rewarà rē okusiwa ijupe kō. Pauru okuwa Piripu wānà kō ojipy'amogeta wete imopā'āa rē. Ajawyi teve okusiwa ipy'amopiryvypy katu kō. Omotekokuwa kō teve, wemikusiwarerà rupi. Kee e'i teve: "Aje Kiristu revejē jaiko mē kō rōmō jaiko. Ajawyi kee jaiko. Jajimokasi jaiko. Janepy'a piryvypy katu jaiko. Janejare'e 'Āg tē janemojipy'amogetaoka wemimota rōmō tijaiko, āwisō i'Āg revejē tijajipy'amogeta ipi", e'i (Prp. 2.1).

"Kareta akusiwatà pejē", e'i Pauru mǎē

1 ¹Ije, Pauru, Kiristu Jesu remīgwai mō. Aã kareta akusiwa ajupa. Āmō, Timoteu ve ereve ekoi, Kiristu Jesu remīgwai rōmō teve. A'e reve kareta akusiwa ajupa.

Peupewarà mō akusiwa ajupa, pirujē Kiristu Jesu koty rewarà kō Piripu taa wānà kō pè. Penōvijā kō pè ve akusiwa aã kareta ajupa. Jōvijā poromo'e mē kō pè.^a Āmō, jōvijā poropātavō mē kō pè teve.^b Mokopejō akusiwa ijupe kō ajupa.

²Janeruwasu ikō tapenereko katu okatuaya rupi nē. Tapepy'amopiryvypy ikō ipi nē. Janerōvijā Jesu Kiristu ve a'evo tapenereko.

^a 1.1 Karai kō *bispo* e'i āwī rapijarà pè. Āmō, *presbítero* e'i kupa. ^b 1.1 Karai kō *diácono* e'i āwī rapijarà pè.

“Janejare'e pè aporegeta peupewarà mō”, e'i mǎ'ě

³ Aporegeta Janejare'e pè remē, kee a'e ipi: “Ikatuay nekoty rewarà kō Piripu taa pè”, a'e ipi. “Ikatuay neinō kō neākarāgwerà kō rōmō toiko kupa”, a'e ijupe ipi. ⁴ Eroryvay aporegeta Janejare'e pè peupewarà mō ipi. ⁵ Epātavō pekupa ipi rewarà mō erory aiko. Poromotekokuwa ypy penena pè remē itōkō, peja'a katu ere peiko ipi. Janejare'e ayvu amojenu āmō kō pè aiko remē itōkō, peja'a jē ere peiko ipi. Jesu rē pejirovija ypy remē itōkō, peja'a ere maekwerà vo jē pejē age'e peiko. Ajawyi eroryvay Janejare'e pè aporegeta peupewarà mō remē ipi. ⁶ Pejirovija ypy Jesu rē remē itōkō, Janejare'e kasia rupi a'evo peiko. Age'e remē pemokasi jē wemimota rupi tapeiko. A'evo jētà, ajaate Kiristu Jesu owyjj mijē uu remē. Akuwa a'evo penereko katutà mǎ'ě. ⁷ Ije ve poroauvay aiko ipi. Ke'irōwā ipe aiko remē, aja'a ywete jē pene aiko ipi. I'ete poroauvay aiko ipi remē, peja'a katu ere peiko ipi rewarà mō. Nemopā'āive kupa remē itōkō, taa taa kō rupi akwa Janejare'e ayvu e'eay Jesu rekoa mojenju jane kō pè erokwa ipi. Oterē jē amojenu ijupe kō tokuwa kupa, Jesu rekoa rupi toiko kupa ipi. A'evo aiko remē itōkō, epātavō eposikoa rē pekupa ipi. Karakuri itōkō peme'ē ije, eporijau ee mǎe kō tapyu eupe ipi. Age'e jimopā'āga pupeaju remē, epātavō jē pekupa. Kōitokō akwa taa taa kō rupi Janejare'e ayvu mojenju remē, epātavō pekupa, āwīvo jē peiko. Ajawyi poroauvay penereko. ⁸ Āwitō Kiristu Jesu penauvay, āwīvo ve ije poroauvay penereko. Jesu tē penauoka eupe. Janejare'e okuwa aje ywete aporegeta remē.

⁹ Ajawyi aporegeta Janejare'e pè remē, kee a'e peupewarà mō ipi:

– Emokasi kō, tojiauvay iko kupa ipi, āmē ywesō tojiau iko kupa.

Tokuwa katu teve neayvu kupa. Tojimotekokuwaway nere tekoua rē kupa, nivoi tekoua wyi tojireko katu kupa. ¹⁰ Emotekokuwa kō tokuwa manyvo ywesō nepota toiko kupa mǎ'ě. Tokuwa manyvo ywesō ikatu tekoua, a'e mǎ'ě ipi.

Aepo a'e peupewarà mō Janejare'e pè ipi. A'evo peiko remē tē, napejavu ekojē'āi Jesu rekoa ipi. Ivo katu peikotà āmē ky'y. Āmē tē Kiristu uu mijē remē, napejimosiōka'āi iwiyi uu remē. Penory kōrijōtā ovāe remē. ¹¹ A'evo peiko remē, ivo peikotà āmē. Jesu Kiristu tē a'evookatā penerekooka tapeiko. Āmē āmō kō omā'ē pene remē, Janejare'e omoe'e ywetetā peupewarà mō kupa āmē.

“Jane wyi wete Jesu Kiristu ikatuay”, e'i mǎ'ě

¹² Apota katu manyvo aiko mǎ'ě tapekuwa, eretārāgwerà kō. Juteu rōvijā kō itōkō emopā'ā jimopā'āga pupe, Jesu rekoa amojenu erokwa rewarà mō. Ajamā'ē amojenu jē ike jimopā'āga pupe wyi ajupa! Nemopā'āi sō kupa remē, namojenu kuwā'āi Janejare'e ayvu ikewarà kō pè mijē.

¹³ Aã sota erãrõ upa mãe kõ pè amojenu ajupa. Ajawyi pirujê ikewarà kõ pè ojenupa ky'y. Jõvijã wasu Sesa retã rãrõarã kõ pè tẽ tesõ amojenu. A'evoa rõmõ tẽ maevo ajimopããoka. Ajawyi pirujê okuwa Kiristu remìgwai rõmõ tẽ ije rewarà mõ emopãã kupa.^c ¹⁴ Ajawyi Janerõvijã ywete koty rewarà kõ erewarà wenu remẽ, ojimokasi iko kupa.

[– Haa! Nojipirau ekøjẽi tesõ Pauru, jimopããga pupe ipe tui remẽ! e'i kupa.]

Ãmẽ ywesõ omojenenu jenu ywete Janejare'e ayvu Jesu rewarà kupa ky'y. Nojipirau tesõ jõvijã kõ wyi kupa ky'y. “Aje ywete Janerõvijã ywete poropãtavõ ipi”, e'i kupa rewarà mõ a'evo ekoi kupa ky'y. ¹⁵⁻¹⁶ Ajawyi Kiristu rekoa mojenuarã kõ kee e'i ojiupe:

– Ja'e Kiristu rekoa mojenenu, Pauru vo, e'i kupa.

Aje, opota Kiristu rekoa rewarà mõ, omojenenu jenu kupa. Erau kupa rewarà mõ teve a'evo ekoi kupa. Okuwa Janejare'e tẽ emonooka Jesu rekoa tamojenenu jenu aiko, eposikoa rõmõ. Eayvumokasi teve ãmõ kõ “aje” te'i eremimojenunerã pè. Ajawyi ajimopããoka remẽ, omojenenu jenu jẽ erekovija pè kupa.

Ajamãẽ oiko teve ere ojimõarõ mãe kõ. Opota tite ererõarõ kupa. Kee e'i kupa:

– Ije ywesõ aapyrasatã Pauru, Kiristu rekoa mojenua rẽ, jimopããga pupe tui remẽ, e'i tite oupe kupa.

Ajawyi omojenenu jenu tite kupa mijã. ¹⁷ A'e kõ kee ne'i:

– Apota Erõvijã rõmõ Kiristu rewarà mõ amojenutã, ne'i kupa. Ije ywesõ imojenuarã rõmõ aikotã Pauru wyi, e'i ojimoe'e tite iko kupa. ãmẽ ywesõ Pauru ojimopiraitã jimopããga pupe tui upa, e'i tite oupe kupa.

¹⁸ Najimõarõi ajamãẽ aepe e'i kupa remẽ. Najimopirai teve aepe renu. Erory jẽ ajupa. Kiristu rekoa ojenu jẽ rewarà mõ erory jẽ ajupa. Imojenuarã kõ omojenenu Janejare'e ayvu imoe'e remẽ, ikatuay eupe. ãwivo ve e'i teitete mãe kõ omojenenu ijayvu remẽ, ikatu jẽ teve eupe ãmẽ. Kiristu rekoa ojenu jẽ rewarà mõ ikatu jẽ. Ajawyi tẽ erory jẽ ajupa. Nopa'ãi erorya. ¹⁹ Akuwa Janejare'e emoẽokatã ajaire. Ajawyi teve erory jẽ ajupa. Peporegeta Janejare'e pè eupewarã mõ rewarã mõ, “Aje, emoẽokatã jimopããga pupe wyi”, a'e ajupa. “Jesu Kiristu 'Ãg tẽ emoẽokatã”, a'e ajupa. Ajawyi nopa'ãi erorya. ²⁰ Apota katu Kiristu rekoa rupi aiko ipi. Napota ekøjẽi ajavy. Apota ajimokasioka a'e rupi taiko ipi. Napotai akyje noerovijai mãe kõ rovake aiko. Ajawyi manyvo aiko remẽ, amoe'eokatã Jesu Kiristu ãmõ kõ pè ereko ipi. Aiko jẽ aiko remẽ, omoe'etã Kiristu kupa erewarã mõ. ãwivo ve amãnõ remẽ, omoe'e jõtã iko erewarã mõ kupa. ²¹ Aã aiko jẽ aiko remẽ, Kiristu rekoa rẽ aiko jẽ ipi. A'e rẽ ywesõ aposiko aiko ipi. Amãnõ remẽ ywesõ ikatutã eupe

^c 1.13 J.K.R. 28.30

ajamã'ê, [ipyri aiko karuarutà aiko rewarà mō]. 22-23 Ajamã'ê age'e remê aposiko ywete jê aiko ijupe ipi. Mōrijō jê aja'a ee mã'ê ajamã'ê. Nakuwai mã ywesō apota. Aiko jê aiko remê, amojenu jenutà ijayvu. Ajamã'ê amãnō remê, kuise'ê aiko karuarutà Kiristu pyri aiko. Ajawyi a'e ywesō ikatuay eupe. 24 Ajamã'ê aiko jê aiko remê, a'e ywesō ikatutà peupe ãmê, poromotekokuwa jêtà pemokasi penereko rewarà mō. 25 Ajawyi kee a'età Janejare'e pè: “Apota aiko puku nekoty rewarà kō pyri aiko, imokasiarà kō rōmō taiko”, a'età Janejare'e pè. Akuwa a'e ywesō apota penewarà mō. Akuwa aiko jêtà pemokasiarà rōmō aiko, tapejirovija ekojê Jesu Kiristu rê peiko, tapenoryvay pejirovijaa rê peiko. 26 ãmê aa mijê pekoty remê, pemoe'e ywetetà Kiristu Jesu jimopã'ága pupe wyi emoëoka rewarà mō.

27 Manyvo jê sō aiko remê, Kiristu rekoa rupi katu jê ikō tapeiko nê. ãmê manyvo peikoa ojenu eupe remê, epy'a katutà ãmê aiko. Aa penesa remê, amã'êtà manyvo peikoa rê ikuwa. Ajamã'ê naaive remê, akuwa jêtà. Ojenu jêtà penewarà eupe ãmê. Akuwatà teve ojevo jê pejimokasi Kiristu rê pejirovija remê. Ojevo jê pemojenu jenu Janejare'e ayvu e'eay nokuwaive mãe kō pè remê akuwatà ãmê. 28 Kee a'e pejê. Tapejipirau e'ã ikō pemoaiarà kō wyi peiko ipi nê. Tapejimokasi jê ikō ovake kō peiko nê. A'evo peiko remê, pejê ywesõtà iwyi kō ãmê. Nikasi'ãi ãmê peupe kupa. Janejare'e tē pemokasità, pejê ywesō i'arà kō gyty tapeiko. A'evoa ojikuwatà pemoaiarà kō pè. Ojimosiokatà ãmê kupa.

29 Kee e'ipa Janejare'e peupewarà mō: “Toerovija Kiristu kupa”, e'ipa Janejare'e peupewarà mō. “Ojimomorijautà Kiristu koty rewarà kō rōmō iko kupa”, e'ipa teve. “A'evoa rōmō tē apyteporo kō”, e'ipa teve peupewarà mō.

Okatuaya rupi pepyteporo a'evo tapeiko. Ajawyi tapejipirau e'ã a'evo peiko remê ipi. 30 ãwitō ije najipirau emomorijau kupa remê, ãwīvo ve tapeiko ãmê ipi. Pemã'ê ere aposiko ywete Jesu Kiristu rekoawerà mojenua rê, ãwisō jane kō “aje” te'i erovija. Age'e pekuwapa ekareta rupi a'evo jê aiko, jimopã'ága pupe aiko ipe remê. ãwitō ajimomorijau ajupa, ãwīvo ve pejê age'e peiko.^d

“Jesu Kiristu reruparà mō tijaiko ipi”, e'i mã'ê

2 1 Aje Kiristu revejê jaiko mãe kō rōmō jaiko. Ajawyi kee jaiko. Jajimokasi jaiko. Janepy'a piryvypy katu jaiko. Janejare'e 'Ág tē janemojipy'amogetaoka wemimota rōmō tijaiko, ãwisō i'Ág revejê tijajipy'amogeta ipi. ãmō, jajiauvay teve ojeeve jajiporijauesa. Kiristu revejê jaiko rewarà mō a'evo jaiko ipi. 2 Ajawyi kee a'e pejê. Ojevo jê tapeiko. Janejare'e remimota rupi ojevo jê tapejipy'amogeta peiko. Tapejiauvay teve ojevo jê peiko. Janejare'e remimota rupi katu tapeiko

^d 1.30 J.K.R. 16.19-40

teve ojevo jê. Janejare'e jipy'amogetaa rupi tapeiko teve ojevo jê. A'evo peiko remê eroryvaytà pene âmê aiko ky'y. ³Pene ywesô tapeja'a e'ã ipi. Kee tapejê e'ã: “Emoe'e kuwasi kupa”, tapejê e'ã peiko ipi. “Ije ywesô ekatuay”, tapejê e'ã teve peiko ipi. Âmô kô rê tapeja'a katu teve ipi. ⁴Penemimotarà rê kôrijô tapeja'a e'ã teve peiko ipi. Koivo kô remimotarà rê teve tapeja'a peiko. ⁵Awitô Kiristu Jesu pirujê janere oja'a, awîvo ve eruparà mô pirujê tapeja'a âmô kô rê peiko âmê ipi.

⁶ Ekoa teãmã Jesu Kiristu Janejare'e rômô ekoi.

Ajamãê Uu pè kee ne'i: “Papa, napotai ajimojane”, ne'i.

“Apota nevo aiko jê, Jôvijã wasu rômô ajikuwa”, ne'i.

⁷ Ovote Jôvijã wasu rômô ekoia wyi opoi rã'i uu ojimojane ike.

Temígwai rômô uu, [jane kô rereko katarà rômô uu].^e

Ajawyi tè jane vo isaky.

⁸ Nojimoe'ei iko ipi. Nojimoe'eokari teve jane kô pè iko ipi.

Uu werovija katu rewarà mô a'evo ekoi.

Omãnôa peve tesô werovija katu Uu.

Yvyra jipokana rê omãnôa peve tesô werovija jê Uu.

⁹ Ajawyi sôsi Janejare'e omoe'eoka Jesu ky'y.

Jôvijã wasu rômô tè tesô omojikuwaoka toiko ky'y.

Ajawyi a'e ywesô jo'arà kytywarà rômô ekoi ky'y.

¹⁰ Ajawyi yvapewarà kô ojimoenâpa'âtà ovake imoe'e rômô.

Mirà kô, yvy pewarà kô ve, a'evotà ekoi.

Taywerà rena pewarerà kô ve, a'evotà ekoi âmê.

Pirujê ojimoenâpa'âtà ovake imoe'e kâramô kupa.

¹¹ A'e kô pirujê kee e'ità imoe'e ky'y:

“Aje ywete Jôvijã wasu tè Jesu Kiristu”, e'ità âmê kupa ky'y.

A'evo omoe'e ywetetà, Janejare'e Ra'yry tè awî rewarà mô kupa.^f

“Jajimomorijau ipe remê, tijajimokasi jê jaiko”, e'i mǎê

¹² Ajawyi kee a'e pejê, ejimorypa kô. Kôitokô ererovija pekupa pepytery pè aiko remê, aekwery vo tererovija katu jê pekupa, pepyterà rupi naikoi remê, a'e pejê. Janejare'e penereko katu peaiwererà wyi.

Ajawyi tapejimokasi jê ekoa rupi katu tapeiko ipi. Tapejireko katu nivoi tekoua wyi peiko ipi. Janejare'e tapemomojy jê peiko, a'evo peiko remê.

¹³ Janejare'e tè wemimotarà opotaoka janeupe ipi, “A'evo si!” tija'e ijupe ipi. A'e tè ojirovijaoka teve jane ipi. ¹⁴ Ajawyi kee a'e pejê. Manyvo peiko remê, tapejimôarô e'ã peiko, a'e pejê. Tapejeaka e'ã teve peiko, a'e pejê.

¹⁵ Ivo katu peikotà âmê. Ajawyi ava, “Nivoi mǎê tè awî”, ne'i'ã pejê âmê.

^e 2.7 2Kor. 8.9 ^f 2.11 Isa. 45.23

Moma'e jê rōwā omo'y kuwa pene ãmê kupa. Nivoi mǎe kō pytery pè peiko remê, nivoi mǎe kō vo rōwātà peiko ovake kō ãmê. Janejare'e votà tètè peiko ijākarāgwerà kō rōmō peiko ãmê ky'y.

Awitō jaytata kō ojikuwa pātōnusu pè ipi, awīvo ve pejikuwatà Janejare'e ākarāgwerà rōmō nivoi mǎe kō pyterà rupi peiko. ¹⁶Janejare'e rekoa rupi jaiko mǎē tapemojenu ijupe kō ipi. A'evō tapeiko ipi. ãmê tètè Kiristu ovāe mijê remê, erorytā pene ovake ãmê. ãmê kee e'etā ijupe:

– Naposiko pānē teywetei sikō Piripu wānà kō pyterà rupi aiko! e'etā ãmê ijupe.

¹⁷Maevō Jesu noerovijai mǎe kō ejukatà, ekoa amojenu ipi rewarà mō. Ejuka sō kupa remê, nimanyvo'āi eupe ãmê, Janejare'e po pè ajime'ēma rewarà mō. Erory jētā aiko, ijayvu mojenua rupi Janejare'e rē pejirovija katu rewarà mō. Pejê ve awi tapenory jê ejuka tarà mē peiko. ¹⁸Awīvo ve erory jētā pene aiko. Ojevo jê ojee tijanerory jê jaiko ipi.

“Janejimorypa kō amonotà pekoty”, e'i mǎē

¹⁹Apota Timoteu amonooka pekoty. Jōvijā Jesu opota remê, kuise'ē jê amonookatā. Manyvo aikoa omome'u katutā pejê, ãmê tapepy'a katu ere. ãmê ajaire ojivy uu ekoty remê, manyvo peikoa omome'utā teve ije ãmê, tepy'a katu teve aiko. ²⁰A'e ywesō erevejê ekoi ipi. A'e rōmō'ite erevejê oja'a katu pene Janejare'e rovake ipi. Ajawyi tètè amonookatā pekoty. ²¹Na'evoi ãmō kō. Wee ywesō oja'a kupa ipi. Jesu Kiristu rekoa rē oja'a a'ugā kōrijō tètè ee kupa ipi.

²²Pevote pekuwa Timoteu rewarà ajamǎē. Ivoa teve pekuwa. Awitō ta'yry mō uu revejê oposiko ipi, awīvo ve itōkō Timoteu erevejê oposiko ywete pepyterà rupi iko, Janejare'e ayvu e'eay amojenu aiko remê ipi. Ajawyi pekuwa katu eewarà ipi. ²³Ajawyi tètè apota amonooka pekoty. Ajamǎē akuwatā rā'ī manyvotā pō aiko rōmō. Akuwapa remê amonookatā pekoty tomojenu pejê ãmê. ²⁴Ajamǎē apota kuise'ē aa ajaire pekoty. Ajawyi Janerōvijā pè, “Apota aa ikoty kō”, a'e ipi.

²⁵Age'e ejimorypa katu Epapōsitu amojivytā rā'ī imono erenone rupi, too ãmê pekoty. Eretārā e'e vo mǎē a'e ekoi. Kōitokō pemuroka ekoty tomojenu manyvo peiko maekwerà, ãmō tepātavō. Epyri oposiko katu iko ipi. Epyri teve omojenu jenu Janejare'e ayvukwerà iko ipi, ãmō kō “aje ywete” te'i. Age'e amojivytā imono pekoty ky'y. ²⁶Peneka rewarà mō amonookatā. Peenupa itekorā maekwerà. Ajawyi ojipy'amogeta ywete pene ky'y. Kee e'i peupewarà mō: “Tojipy'amopirai e'ā etekorānā rē kupa”, e'i peupewarà mō ipi. ²⁷Aje itekorā ywete mijā. Omānō taray mijā. Janejare'e tètè oporijauesa imomoeraoka. Ije ve eporijauesa teve Janejare'e. Epapōsitu sō omānō ewyi remê, eāgyoay kuwa ee mijā. Ajamǎē Janejare'e nemoāgyookari. ²⁸Ajawyi eroryvay janejimorypa katu amonookatā pekoty remê, tapemǎē ee. Tapenory ee. A'evō remê epy'a

katu sa'utà pene aiko. ²⁹Ajawyi ikō tapenoryvay ovāe pepyri remē nē. Tapemomyta ikō pepyri nē. A'evo sireko Janerōvijā Jesu koty rewarà kō ipi. Epaposito oposiko katu Janerōvijā Jesu remīgwei rōmō ipi. A'evo mǎe kō tijamoe'e ipi. ³⁰Kōitokō jypy remē manyvo napejē'ai pejo peposiko epyri remē, Epapositu pemuu penekovijarerà rōmō epātavōarà rōmō. Nojipirau tesō uu. Ajaire itekorā ywete ky'y. Werywete omānō epātavō iko remē, Kiristu rekoa rupi oposiko iko remē. A'evo mǎē tē jamoe'e ipi.

“Jesu kōrijō tē ikatuay wete eupe ky'y”, e'i mǎē

3 ¹Āmō tē mijē amome'utà pejē, eretārāgwerà kō. Kee a'e pejē. Kōitokō a'epa jypy remē pejē, “Tapenory peiko ipi, Janerōvijā ywete revejē peiko mǎe kō rōmō”, a'epa jypy remē pejē. Aepo a'e jē pejē. Kee rewarà mō. Napenoryi sō ee remē, maevo perovija ywe'e titetà nivoi mǎe kō ayvu āmē. Ajawyi namowasui aepo imojenu jē ajupa ipi.

²Kee e'i tite mǎe kō ayvu taperovija e'ā:

– Napejimosipire'oi sō remē, Janejare'e napepota'ai wākarāgwerà kō rōmō tapeiko. Janejare'e ākarāgwerà jikuwaparà tē a'evoa, e'i tite āmō kō.

Aepo e'i kupa remē, taperovija ywe'e tite e'ā ijayvu kō āmē ipi.

³A'evo ekoi mǎē rōwā Janejare'e wākarāgwerà kō rōmō oinō ipi. Janejare'e ākarāgwerà kō mojikuwaparà rōwā jimosipire'oa. Nijanerako'i a'evoa rē jaiko ipi. Jane ywete Janejare'e ākarāgwerà kō rōmō jaiko. Kee jajikuwa ijākarāgwerà kō rōmō jaiko. I'Āg tē janepy'a pē tui. A'e janepātavō aje ywete tijamoe'e jaiko ipi. Āmō, Kiristu Jesu revejē jaiko mǎē rē janerory teve jaiko. A'evo jaiko remē, jajikuwa ijākarāgwerà kō rōmō. Ajawyi janerekokwerà rē nijaja'ai jaiko ky'y.

⁴Ajawyi aepo e'i sō pejē kupa remē ikō, taperovija e'ā ikō ijayvu kō āmē ipi nē. Ije ywesō aapyrasa kō a'evoa rē aiko mijā. Kee jaa kō rē aja'a aiko ipi mijā.

⁵[Janerekoa rupi taiko Isaeu jeapyrerà kō rōmō, a'e tite mijā.] Esaky remē, 8 'arà rōmō arokwapa remē itōkō, eremosipire'o kupa, Janejare'e upewarà jikuwaparà rōmō taiko āmē. Juteu rōmō tē esaky. Ajawyi a'evo erereko kupa. Āwitō Isaeu jeapyrerà tē eruu, āwīvo ve emāmā. Tāmō Pejāmī jeapyrerà mō tē ije. Isaeu kō erāmōi kō pawete. Ajawyi Juteu jeapyrerà e'e tē ije. Epereu e'e tē ije.⁸ A'evo 'evo aiko maekwerà rē erako'i aiko ipi mijā. “Juteu kō ywesō Janejare'e opota ipi”, a'e tite mijā. Ajimokasiay Juteu kō rekoa rupi katu aiko mijā, Pariseu atyry mō tē ije rewarà mō. ⁶Ajimokasiay we'e tite Janejare'e remimotarà rā'āga rupi aiko ipi mijā. Ajawyi amomorijau tesō Jesu koty rewarà kō ipi mijā. Kee a'e tite: “Āwīvo aiko remē tē Janejare'e orytà ere”, a'e tite eupe ikuwa e'ā.

§ 3.5 Epereu a'evo ve Juteu. Kee jaa tē aepo Pauru e'i mǎē: “Ajimokasi ava jē rōwā eaiwererà mō toesa imo'y ere”, jaa tē. Rom. 11.1; J.K.R. 23.6; 26.5

Ajireko katu Juteu kō rekoa rupi aiko ipi mijã. Ajawyi nimanyvoi maevo sō tite aiko jane kō rovake aiko ipi mijã. Ije ywesō aapyrasa eretãrãgwerã kō a'evoa rē aiko mijã. A'evo 'evoa rē ywesō ajirovija ipi mijã.^h

⁷Age'e remē nerako'i a'e a'evoa rē aiko ky'y. Kiristu rē kōrijō tē ajirovija erako'i rōmō ky'y. ⁸Erōvijã Kiristu Jesu revejē aiko ky'y. A'e rē ywesō ikatuay eupe ky'y. A'e rē ywesō ajirovija ky'y. A'e ywesō apota katu ky'y. A'e rōmō'ite ky'y. Ajawyi erako'i ee maekwerã kō rē naja'ai 'ete ky'y. Aityypyypipa aekwerã kō ky'y. Āwitō janema'e kō ijupa remē, jamopopopa ipi. Jaityypyypipa ipi. A'evo 'ejē aiko. Erako'i ee maekwerã kō aity e'e ky'y. Aje ywete Kiristu Jesu kōrijō tē ikatuay wete eupe ky'y. A'e naity'ãi ãmē. ⁹A'e reve kōrijō tē aikotã ky'y. Jypy remē kee a'e tite ajipy'amogeta ipi: “Juteu kō rekoa rupi aiko ipi remē, ‘Ivo mã'ē tē ene’, e'itã Janejare'e eupe”, a'e tite mijã. Age'e akuwapa janevotē rōwã ivo jaiko Janejare'e pē ipi. Janejare'e tē ivo janemoigooka ipi, Kiristu rē jajirovija remē tē. ¹⁰Ajawyi Kiristu revejē aiko mã'ē tē apota. A'e omãnō maire opoera mijē oē oo. Aekwery vo ekoi mijē Uu pyri ky'y. Ajawyi ikasiay wete Kiristu, a'e eupe ipi. Ikasia rupi aiko mã'ē ywesō apota. Āwitō Kiristu “hoō” e'i ojimomorijau janeupewarã mō, āwīvo ve “hoō” a'e ajimomorijau ijupewarã mō remē ipi. A'e itōkō omãnō janeaiwererã reityypyypipaoka janewyi. Āwitō nojipiraiui 'ete ivo e'ãa pē, āwīvo ve taiko teve ije, a'e. ¹¹Amãnō remē, Janejare'e emomoeraokatã tē taiko karuaru aiko ky'y. Ipyri aatã mãe rã aãrō gatu aiko.

“Ajimokasi jē Jesu rekoa rupi katu aiko”, e'i mã'ē

¹²⁻¹³Kee a'e teve, eretãrãgwerã kō. Jypy remē Kiristu Jesu erereko okoty rewarã rōmō, ekoa rupi katu taiko. Kee na'ei ajamã'ē: “Najavyi 'ete ekoa ipi. Emimota rupi katu aiko ky'y”, na'ei. “Ekoa rupi katu aiko ijãkarãgwerã rōmō aiko ipi”, na'ei, ajavy jē rewarã mō. Ajamã'ē ajimokasi jē upi katu taiko, a'e pejē. A'evoa rōmō Kiristu erereko katu. Erekoawerã rē naja'ai ajamã'ē aiko. Erekoa rã rē kōrijō tē aja'a aiko ky'y. ¹⁴Janejare'e epyteporopa Kiristu Jesu rē tajirovija, opyri taiko karuaru aiko. A'evoa rã rē kōrijō tē aja'a aiko ky'y. Ajawyi ajimokasiay wete emimota rupi katu taiko ãmē.

¹⁵Jajimotekokuwa ekoa rē remē, jatekokuwa ee ipi. Ajamã'ē ava mō pepytery rupi nomãrãmoa'ui remē, Janejare'e omotekokuwa jētã Jesu rekoa rē, a'e rupi katu toiko ky'y. ¹⁶Manyvo jaiko remē, ekoa rupi jaiko maekwerã vo jēsi tijaiko ipi.

¹⁷Kee a'e pejē, eretãrãgwerã kō. Āwitō ajimokasiay ywete Jesu remimota rupi aiko, tãwīvo ve tapeiko. Pepyterã rupi a'evo ekoi mãe kō reruparã mō tapeiko teve.

^h 3.6 J.K.R. 8.3; 22.4; 26.9-11

¹⁸Oiko jane kō kee e'i ywe'e tite mǎe kō: “Kiristu omānōma yvyra jipokana rē, eaiwererā repykarā mō. Ajawyi eremimotarā rupi aiko jē remē, nimanyvoi, ‘awyjepa’ e'ipa eaiwererā pē rewarā mō”, e'i ywe'e tite oupe mǎe kō. A'e kō kee ne'i ywe'e'i tite: “Kiristu remimota rupi jēsi taiko”, ne'i ywe'e'i tite kupa. Uve ijaty jane kō aepo e'i ywe'e tite oupe mǎe kō. A'e kō rewarā akusiwa remē, emoāgyo tesō erereko. Aja'o tesō aiko, aja'a ee kō remē. ¹⁹A'e kō wemimotarā rē ywesō oja'a iko ipi. Ojimorya rē ywesō teve oja'a iko kupa ipi. Ojimosioka kuwasi kupa mijā! Ajamāē ojimoe'e kōrijō tē kupa! Wekoa ikewarā rē ywesō oja'a py'yi ywe'e tite kupa ipi. Ajawyi jimomorijau wasua rena pupe tē ootā kupa ky'y.

²⁰Jane āmē janerena rā rē jaja'aray wete jaiko, Janejare'e rena rē. A'e kyty jaētā jaa, awyje māerā tijaiko karuaru. Janerōvijā Jesu Kiristu tē owyjytā uu janepjarā mō janereraa wena kyty, janerereko katuarā rōmō. Ajawyi simoa'u katu ivāea. ²¹Ikasiay Janerōvijā ywete. Pirujē jane kō pē ojimojōvijā wasutā, pirujē weminōgwerā kō pē, okasia rupi. Janepirā kō omoteetā okasia rupi. Janepirā age'ewarā nikasi. Omānōtā mǎe rā tē. Na'evo'āi janepirā wekovijanō remē. Āwitō Jesu pirā owaray māerā tē, āwivotā wereko janepirā rā okasia rupi kāramō.

“Tapejiauvay ojeeve peiko”, e'i mǎē

4 ¹Āmō kee a'e, eretārāgwerā kō. Pejimokasi jē ikō Janerōvijā ywete revejē peiko nē, a'e pejē. Poroauvay rewarā mō aepo a'e pejē. Poroekaray wete aiko ipi. Aja'aray teve pene aiko ipi, emoryvay erereko pekupa rewarā mō.

²Age'e amogetatā rā'ī wāivī kō mō. Evotia eu mǎē. Āmō, Sītiki eu mǎē. A'e kō amogetatā rā'ī. [Kee e'i mǎē aenu penewarā: “Ijayvu teitete ojupe iko kupa ipi”, e'i mǎē.] Ajawyi eremikusiwarerā rupi kee a'e pemogeta. Janerōvijā ywete remīgwai kō tē rōwā sipōkō pejē mijā? a'e peupe. Ajawyi awyje tapejimory mijē ojeeve, Janerōvijā rē pejirovija mǎe kō rōmō. Tapejiauvay ojee peiko, a'e peupe.

³Kee a'e teve evo oposiko pemotekokuwa mǎē rōmō mǎē pē. Emojimoryoka āwī wāivī kō tojiauvay mijē iko kupa, a'e ene. Jypy remē itōkō oposiko ywete epyri Janejare'e ayvu e'eay mojenua rē iko kupa mijā. Keremēti pyri itōkō oposiko janereve iko kupa mijā. Āmō kō pyri ve oposiko janereve Janejare'e ayvu e'eay mojenua rē iko kupa mijā. Erā kō ojikusiwapa Janejare'e kareta rē, ipyri oiko karuarutā mǎe kō rōmō. Ajawyi emojimoryoka kō mijē, a'e ene.

⁴Kee a'e teve pejē, pirujē pejē. Tapenory py'yi ikō peiko nē, Janerōvijā ywete revejē peiko mǎe kō rōmō. Ajawyi tapenory ikō peiko nē, a'e mijē pejē.

⁵Sātāmy ekoi mǎe kō rōmō ikō tapeiko nē, kuise'ē Janerōvijā ywete uutā rewarā mō. Pirujē mirā kō rovake sātāmy mǎe kō rōmō tapeiko ipi.

⁶Tapejimopirai e'ã ikõ waypete penekoa remẽ nẽ. Janejare'e pè kõrijõ ikõ tapeporanu peiko nẽ. Emime'ëgwerà kõ rè teve ikõ tapeja'a jẽ peporegeta ijupe remẽ nẽ. Penereko katua rè ikõ tapeja'a jẽ peiko nẽ. A'evoa rè penorya tapemome'u ijupe imoe'e ipi. ⁷Janejare'e ywesõ poromo'ãgatu mã'ẽ tẽ. Manyvo nijareko'ãi janemo'ãgatu ikuwaa. A'evoa rupi janepy'a mopiryvypy janerereko ipi. Nijanemopirai teve janerereko. A'evõ ikõ tapenereko, Kiristu Jesu revejẽ peiko mãe kõ rômõ.

⁸Age'e kee a'età pejẽ, eretãrãgwerà kõ. Ikatuay wete mã'ẽ simo'y joe ipi, Jesu koty rewarà kõ rômõ. Ajawyi kee ja'età: Aje oporegeta mã'ẽ pãwĩ? ja'età. Temirovija tẽ pãwĩ? ja'età. Temimotekoe'e teve pãwĩ? Ivo mã'ẽ tẽ pãwĩ? ãmõ, ojireko katu nivõ mã'ẽ wyi mã'ẽ tẽ pãwĩ? ja'età. Ojimory katu ãmõ kõ rè mã'ẽ tẽ pãwĩ? ja'età. Owaray oporegeta ipi mã'ẽ tẽ pãwĩ? Temimoe'e tẽ pãwĩ? ja'età. Aepo ywesõ ikatu ja'età Jesu koty rewarà kõ rômõ ãmẽ. Aepo jaa rè tijajipy'amogeta jaiko ipi.

⁹Eayvukwerà itõkõ peenu katu, poromotekokuwa pepyterà rupi aiko remẽ. Pemã'ẽ gatu teve itõkõ ere ipi, manyvo aiko remẽ. ãwĩ ãwĩ kõ rè itõkõ pemã'ẽ. Ajawyi a'evõ jẽ tapeiko. Tapenearai e'ã aekwerà wyi peiko. Janejare'e penevejẽ ekoità, pirujẽ janepy'a mopiryvypyarà rômõ.

“Erory penemimuurerà rè”, e'i mã'ẽ

¹⁰ãmõ, kee a'e pejẽ. Karakuri penemimuurerà ovãema ije. Eroryvay ee aiko. ãwitõ epãtavõ pekupa aposiko ppy pepyri remẽ, ãwivo mijẽ age'e peiko. Ajawyi eroryvay aiko. Aje, Janerõvijã revejẽ erory pene aiko, peja'a jẽ tesõ ere rewarà mõ. Kee na'ei ajamã'ẽ: “Manyvore sipõkõ nepãtavõi jypy remẽ kupa?” na'ei ajamã'ẽ, manyvo napejẽ'ãi epãtavõ pekupa mijã rewarà mõ. ¹¹Eporijau ywete rewarà mõ rõwã aepo a'e pejẽ ajamã'ẽ. Manyvo aiko remẽ, epy'a katu jẽ aiko ipi. Ajimo'epa a'evoa rè aiko ipi. ¹²ãmõ 'ary pè areko ywete sa'u ema'e kõ. ãmõ 'ary pè eporijau ipe aiko. Ajamã'ẽ manyvo aiko remẽ, epiryvypy katu jẽ aiko. Eamyay ipe remẽ, epiryvypy katu jẽ teve aiko ipi. Ekasi katu remẽ, epiryvypy katu jẽ teve aiko. Naiko ywe'ei ema'e kõ eupe remẽ, epiryvypy katu jẽ ve aiko. ãmõ, uve ema'e kõ remẽ, epiryvypy katu jẽ ve aiko. Manyvo nyvo aiko remẽ, epiryvypy katu jẽ aiko ipi, ajipokuwapa a'evoa rè aiko rewarà mõ. ¹³Manyvo nyvo aiko remẽ, Jesu Kiristu kasia rupi aiko, aã kõ tainõ.

¹⁴Ajamã'ẽ eroryvay epãtavõ pekupa age'e ky'y remẽ, ajimomorijau ajupa remẽ. ¹⁵Jypy remẽ Janejare'e ayvu e'ey amojenu ppy pepyterà rupi aiko remẽ itõkõ, epãtavõ pekupa ipi. Ajaire Masetonia vyv pe wyi aa imojenu remẽ itõkõ, pejẽ rômõ'ite itõkõ epãtavõ pekupa, Jesu koty rewarà kõ rômõ. Pejẽ rômõ'ite teve karakuri peme'ẽ ije epãtavõarà kõ rômõ. Pekuwapa a'evoa. ¹⁶Tesaronika taa pè eporijau aiko remẽ itõkõ, pemonooka jẽ karakuri ije. Karakuri pemono ppy. Ajaire itõkõ pemono

mijē.ⁱ 17 Kee na'ei ajamã'ẽ. “Epãtavõ ywete kuwasi kupa!” na'ei pejẽ. Najimo'eai aiko. Janejare'e owaray wereko epãtavõ mãe kô ipi, nokãte'ãi eupe kupa remẽ, a'e kôrijõ tẽ ajipy'amogeta ipi.

18 Epapositu werupa penemimuurerà ije. Aã kareta akusiwa ipyya mojikuwaparà rômõ ajupa. Areko ywete ema'e kô age'e remẽ. Oyte ije ky'y. Eroryvay pene aiko ãmẽ. Janejare'e ve oryvay pene, epãtavõ pekupa rewarà mõ. Napekãte'ãi ije rewarà mõ.^j 19 Imoma'e ywete mã'ẽ rômõ tẽ Janejare'e ekoi. A'e tẽ nokãte'ã'ãi 'ete pejẽ iko. Pirujẽ peporijau ee mãe kô ome'etã pejẽ ipi. Kiristu Jesu rẽ pejirovija katu rewarà mõ a'evotã penereko. 20 Janeruwasu tẽ Janejare'e. A'e kuwasi jamoe'e karuaru kuwa mijã. Ô'õ, awyje katu ãwivo jamoe'e karuaru jaiko ipi.

Kareta moawjẽpaa

21 Pirujẽ mokopewarà Kiristu Jesu koty rewarà kô wyi nerearai aiko ipi. Epyriwarà kô ve naearai pewyi iko ipi. 22 Pirujẽ Janejare'e koty rewarà kô ikewarà kô opota ojimory pene ekareta rupi. Romã pewarà rövijã wasu Sesa retã wryy pewarà kô ywesõ a'evo ekoi.

23 Jesu Kiristu tapenereko katu okatuaya rupi, Janerövijã ywete rômõ. [Awjẽpaa aã ekareta ky'y.]

ⁱ 4.16 J.K.R. 17.1; 2Kor. 11.9 ^j 4.18 Jisyry. 29.18